

SARS, NPA BA TLO TJHOTHISA BALEFALEKGETHO MABAPI LE DIKGUTLISO TSE MORAO

PRETORIA, 16 Mmesa 2018 - Ditshebeletso tsa Lekgetho tsa Afrika Borwa (SARS) di qadile ka boiteko bo botjha mmoho le Bolaodi ba Botjhotjhisi ba Setjhaba (NPA) ho tjhothjisa balefalekgetho ba sa ikobeleng tefo ya lekgetho, ho kenyeleditswe le Maafrikaborwa a tummeng, ba hlolehileng ho nehelana ka dikgutliso tsa bona.

Balefalekgetho ba fumanwang ba le molaoto ba tla qetella ba na le rekoto ya ditlolo tsa molao.

Ho se ho bile ho na le motho ya fumanweng a le molato mane Port Shepstone bekeng e fetileng ka lebaka la boiteko bona. Mong. S Ragunat, jwalo ka moemedi wa SPS Distributors, o lefile kotlo ya ho dumela molato ya R5600 mane Lekgotleng la Dinyewe la Lebatowa la Port Shepstone ka lebaka la ho se nehelane ka dikgutliso tse fetang 50 tsa Lekgetho la Boleng bo ekeditsweng (VAT), Lekgetho la Lefa-ha-o-ntse-o-fumana Moputso (PAYE) mmoho le tsa Lekgetho la Lekenno la Kgwebo (CIT). O ile a laelwa mme o se a bile a nehelane ka dikgutliso tsohle tse morao.

Ho hloleha ho nehelana ka lekgetho kapa kgutliso ya VAT ke tlolo ya molao ho latela dintlha tsa Molao wa Tsamaiso ya Lekgetho mmoho le wa Lekgetho la Boleng bo ekeditsweng.

Ho tla boela ho ba le dinyewe mane Ficksburg le Bothaville Freistata, mmoho le Lekgotleng la Makgistrata wa Newcastle mane KwaZulu/Natal bekeng ena kaofela ha yona.

Letsholo lena le tshwaya ho tiiswa ha Projeke ya SARS ya Dikgutliso tse Morao e ileng ya thakgolwa mafelong a selemo se fetileng moo SARS e neng e ikemiseditse ho phahamisa phadimeho hara balefalekgetho mabapi le dikgutliso tse sa ntseng di le morao.

Dilemong tse mmalwa tse fetileng SARS e hlokometse ho nyoloha ho sa amoheleheng ho mabapi le ho se nyehelwe ha dikgutliso ho phatlalla le mefuta yohle ya makgetho, ho kenyeleditswe le PAYE, VAT, lekenno la kgwebo le lekgetho la lekenno la batho ka bomong.

Mafelong a Tlhakubele 2018, Buka ya SARS ya Dikgutliso tse Morao e bontshitse hore balefalekgetho ba ntseng ba sebetsa ba ne ba kolota SARS dikgutliso tse ka bang dimilijone tse 30, hangata ho ne ho na le dikgutliso tse ngatangata tse morao tse neng di so ka di nyehelwa ke molefalekgetho a le mong.

Qeto ya sebedisa mokgwa ona wa phethahatso ya molao wa boikobelo ba tefo ya lekgetho ka tsela ya botjhotjhisi ba ditlolo tsa molao ke boiteko ba ho qetela. Ho ile ha ikopanngwa pele le balefalekgetho bohle ba tlang ho hlahella lekgotleng mme ha ba ha ntshuwa ditseko tsa makgaolakgang pele ho ka tswelwa pele ka diketso tse mabapi le ditlolo tsa molao. Mokgahlelong ona NPA e se e nyehetswe di-dokete tse 36.

Ho theoha hona ho makatsang ha ho nyehelwa ha dikgutliso ebile e nngwe ya ditshupo tsa bohlokwa tse senotseng ho nyehla ha boikobelo ho ileng ha toboketswa ke Letona la Ditjhelete Nhlanhla Nene ha ho ne ho tsebahatswa dipalo le diphetho tsa pokello ya lekgetho tsa selemo sa ditjhelete sa 2017/2018.